

Headlines

1. लेफ्टिनेंट गवर्नर मनोज सिन्हा होरें आतंकवादी सरबंधें दे दोषी द'उं सरकारी मलाज़में गी सेवा शा बर्खास्त करी दित्ता ऐ।
2. मुख्मन्त्री उमर अब्दुल्ला होरें जम्मू-कश्मीर च सैलसफा गी बढावा देने लेई विरासती संपत्तिएं दे संरक्षण ते उसी स्हेई ढंगै'नै इस्तेमाल करने लेई कीते जा'रदे उपाएं दी समीक्षा कीती।
3. मुख्मन्त्री होरें लोकें गी महत्वपूर्ण समाजी ते विकास मामलें बारै जानकार बनाने दे मकसद कन्नै अज्ज जम्मू संभाग च त्र'उं दिनें दे सूबाई सतह दे जागरूकता कार्यक्रम दा उद्घाटन कीता।
4. जम्मू-कश्मीर दे नौजवानें दा इक डेलीगेशन वतन को जानो कार्यक्रम दे तैहत राष्ट्रपति भवन च राष्ट्रपति द्रौपदी मुर्मु हुं'दे कन्नै मिलेआ।
5. जम्मू-कश्मीर च भारी बरखा, रजौरी जिले च सबनें शा मती बरखा बरी ऐ। ल्हास-पस्सियां पौने करी जम्मू-श्रीनगर राष्ट्री जरनैली सिडक बंद, गड्डिएं दी आओजाई ब्हाल करने लेई जतन बरोबर जारी ना।



LG-employee Sacked

उपराज्यपाल मनोज सिन्हा होरें आतंकवादी संगम लश्कर-ए-तायबा ते हिज्बुल मुजाहिदीन कन्नै सरबंध होने दे चलदे 2 सरकारी कर्मचारी गी मुअत्तल करी दित्ता ऐ। आकाशवाणी जम्मू दे संवाददाता दी रिपोर्ट मूजब इनें कर्मचारिएं चा इक फरहत अली खांडे रामबन च शिक्षा मैहकमे च क्लास4 कर्मचारी हा। एहू हिज्बुल मुजाहिदीन लेई कम्म करदा हा ते आतंकवादी नेटवर्क गी परतिए बनाने ते आतंकवादिएं दे परौआर आहलें च फंड तकसीम करदा हा जिसलै कि बांडीपोरा दा रौहने आहला मोहम्मद शफी ग्रामीण विकास मैहकमे च कम्म करदा हा ते लश्कर-ए-तैयबा दे आतंकवादिएं गी रिहायश ते होर दुआ समेयान उपलब्ध करोआंदा हा। उसी अप्रैल 2025 च असला बरूद कन्नै फगडेआ गोआ हा। एहू कार्रवाई प्रशासन दी आतंकवाद गी दना बी नेई बर्दाश्त करने आहली नीति दे तैहत कीती गेई ऐ।



CM-Heritage Meeting

मुख्यमंत्री उमर अब्दुल्ला होरें जम्मू-कश्मीर च विरासत ते सांस्कृतिक सैलसफा गी बढावा देने बारै इक उच्च सतह दी जायजा बैठक लाई। इस दरान विरासत दी साम्भ सम्भाल ते उसी सैलसफा स्हाबै बढावा देने बारै तरीकाकारें पर चर्चा होई। सोशल मीडिया दी इक पोस्ट च मुख्यमंत्री होरें सांस्कृतिक विरासत ते अपनी पंछान गी बचाने दी महत्ता गी उजागर कीता। उनें सैलानिएं गी आकर्षित करने आस्तै विरासत आधारित सैलसफा गी विकसित करने ते खित्ते दी समृद्ध ते सगोसार विरासत ते इतिहास गी दर्शाने पर जोर पाया तां जे जम्मू-कश्मीर मुख्य च सांस्कृतिक सैलसफा आहली इक प्रमुख थाहर दे तौर पर उभरी सकै।



CM-Ceasefire RXN

मुख्यमंत्री उमर अब्दुल्ला होरें अमरीका ते ईरान बश्कार हाल च घोशित संघर्ष विराम बारै अपने बचार सांझे कीते न। उनें अमरीका ते इजराइल आसेआ ईरान खलाफ छेड़ी गेदी जंग दे पिच्छे दे इरादे पर सोआल पुट्टे होई आखेआ जे संघर्ष बिराम दे कन्नै होमुर्ज जलडमरूमध्य खुल्ली गेआ ऐ पर एह तनोतनी शुरू होने कोला पैहले एह जलमार्ग सबनें आस्तै बरोबर खुल्ले दा हा। सोशल मीडिया मंच एक्स पर अपने बचार सांझे करदे होई उमर होरें इस जंग गी गलत करार दित्ता ते आखेआ जे 39एं दिनें दी इस जंग थमां अमरीका नै आखिर केहू हासिल करी लैता ऐ। ध्यानजोग ऐ जे ईरान आसेआ होमुर्ज जलडमरूमध्य थमां सबनें गी सुरक्षित आओजाई दी खुल्ल देने दे मगरा दवें मुख्य संघर्ष बराम लेई राजी होई गेदे न।



CM-Awareness

मुख्यमंत्री उमर अब्दुल्ला होरें अज्ज जम्मू दे कन्वेंशन सेंटर च 3 दिनें दे सुबाई सतह दे इक्क जागरूकता कार्यक्रम दा उद्घाटन कीता। स्कूली शिक्षा विभाग आसेआ आयोजित इस पैहलकदमी दा मकसद विद्यार्थियें, अध्यापकें ते आम लोकें गी बी बक्ख-बक्ख महत्वपूर्ण समाजी ते विकास बाहे आहले मुद्दे, जियां नशे दी कवैतू थमां बचने, पर्यावरण दी राखी-हिफाजत करने, ट्रैफिक नियमें बारै जागरूक बनने, भविक्ख दी बत्त लेई सलाह-मिश्वरा हासल करने ते मानसिक सेहत बारै जानकार बनाना हा। उद्घाटन समारोह दा बक्ख-बक्ख जिलें च लाइव प्रसारण बी कीता

गेआ। कठुआ जिले च एहू कार्यक्रम महिलाएं दे सरकारी डिग्री कॉलेज आहले आडीटोरियम च आयोजित होआ जेदी प्रधानता डिप्टी कमिशनर राजेश शर्मा होरें कीती।

इस्सै चाल्ली साम्बा जिले च इस कार्यक्रम दा आयोजन जिला प्रशासनिक परिसर च कीता गेआ जित्थे मुख शिक्षा अधिकारी यशपाल शर्मा होरें कार्यक्रम दी अगुवाई कीती।

<><><><><><>

Rana-Medical Camp

जनजातीय मामलें दे मंत्री जावेद अहमद राणा होरें पुंछ जिले दी मेंढर थाहर दो रोजा मेडिकल शिविर दा उद्घाटन कीता। इस मौके पर किट्टु गी संबोधित करदे होई मंत्री होरें बन्ने आहले इलाके ते दूर-दरेडे ते पछेत्रें इलाकें च नेहू कैंप दे आयोजन दे महत्व गी उजागर कीता। उनें इस शिविर दा आयोजन करने लेई आयोजकें दी सराहना कीती। इस शिविर च खरी मती गिनतरी च लोक शामिल होए। इस दरान लोकें दी जांच कीती गई, उनेंगी दोआइयां बी दित्तियां गेइयां। मंत्री होरें सेहत सरबन्धी सहूलतां हर कुसै तगर पजाने प्रति सरकार दी बचनबद्धता गी फही पक्का कीता।

<><><><><><>

Prez. JK Youth

जम्मू-कश्मीर थमां गेदे युवाएं दे इक प्रतिनिधिमंडल नै राष्ट्रपति भवन च राष्ट्रपति राजधानी च वतन को जानो प्रोग्राम तैहत गेदे हे। एहदा सरिस्ता गृह मंत्रालय आसेआ कीता गेदा हा। गल्लबात दरान राष्ट्रपति होरें युवाएं गी राष्ट्र निर्माण च योगदान देने लेई प्रेरित कीता ते मुख दी समृद्ध ते सगोसार रिवायत ते बन सबन्नता थमां प्रेरणा लैने लेई आखेआ। राष्ट्रपति होरें जन्न दी सराहना कीती ते आखेआ जे एहदे राएं युवाएं गी मुख दे बक्ख-बक्ख हिस्सें गी दिक्खदे दा मौका थ्होंदा ऐ।

<><><><><><>

CRPF-Tour

उधमपुर आधारित सी.आर.पी.एफ दी 137 बटालियन नै सिविक एक्शन प्रोग्राम तैहत सरकारी हायर सेकेंडरी स्कूल घड़ी दे विद्यार्थिं गी इक हफते लेई भारत दर्शन टूर पर भेजेआ ऐ। तकरीबन 20 विद्यार्थिं गी जम्मू थमां बनारस लेई भेजेआ गेआ ऐ तां जे ओहू मुख दी संस्कृति

ते विरासत बारै पता लाई सकन। इस मौके पर विधायक पवन कुमार गुप्ता, डीआईजी उधमपुर रियासी रेंज शिव कुमार शर्मा ते 137 बटालियन दे कमांडेंट मनोज कुमार सिखों होर मौजूद हे।

<><><><><><>

JMC-Tawi Fest.

जम्मू नगर निगम आसेआ 14 थमां 16 अप्रैल तगर तवि रीवर फ्रंट पर त्रै रोजा तवि महोत्सव दा आयोजन करने दी घोशणा कीती गई ऐ। एहू महोत्सव बसाखी दे सरबंध्यै च करोआया जा'रदा ऐ। इक्क प्रेस कांफ्रेंस गी संबोधित करदे होई जेएमसी कमिशनर देवांश यादव होरें आखेआ जे एहू महोत्सव सैलसफा ते सूचना मैहकमे कन्नै रलियै आयोजित कीता जा'रदा ऐ। एह्दे च किशती दी सैर यानि बोटिंग, इक्क पारम्परिक कुश्ती, डोगरी व्यंजन, हत्थखड्डी ते दस्तकारी दे स्टाल, सांस्कृतिक प्रस्तुतियां, लेजर शो ते बच्चें लेई केई सारी गतिविधियें दा आयोजन बी कीता जाह्गा। कमिशनर होरें लोकें गी गुजारिश कीती ऐ जे ओहू बधी चढियै इस महोत्सव च शामिल होना। उनें आखेआ जे एहू महोत्सव साफ-सफाई ते तवि नदी दे संरक्षण गी बढावा देगा।

<><><><><><>

Weather

जम्मू-कश्मीर दे केई सारे हिस्सें च बडुलै साड्डे 8 बजे तगर खरी मती बरखा दर्ज कीती गई। राजौरी च 50 एम.एम, जम्मू च 42, उधमपुर च 41 अशारिया 6 एम.एम ते कटडा च 39 अशारिया 8 एम.एम बरखा दर्ज कीती गई। मौसम विभाग मूजब केई सारी थाहें पर अज्ज आस्तै बी हल्की थमां दरम्याने दर्जे दी बरखा दी पेशगोई कीती गेदी ऐ। 9 अप्रैल थमां 16 अप्रैल तगर किश थाहरें पर हल्की बरखा होई सकदी ऐ, खासतौर पर दपैहरी मगरा जां फही संज्ञा लै। प्रशासन नै लोकें गी सौहगा सतर्क रौहने ते मौसम दी ताजा जानकारी रखने लेई आखेअ ऐ।

<><><><><><>

Traffic Suspended

जम्मू-श्रीनगर राश्ट्री जरनैली शिडक पर गड्डिणं दी आओजाई अजें बी बंद ऐ कीजे बनिहाल कश ल्हास-पस्सियां पेई गेदियां न। शिडक गी साफ करने दा कम्म जारी ऐ। प्रशासन नै लोके गी अपील कीती ऐ जे ओहू अगली हिदायतें तगर राश्ट्री जरनैली शिडक पर यात्रा नेई करना।

